

## **EGIPATSKI POKRET SELEFIJJA**

### **ne prizna žrtve na stadionu u Port Saidu šehidima, nego poginulim na stranputici i besposlici**



Egipatski misionari pokreta Selefija

Glasnogovornik pokreta Selefija u Egiptu šejh Abdul Mun'im Eš-Šehhat izazvao je žestoku polemiku izjavom da poginuli na nogometnom stadionu U Port Saidu nisu nikakvi šehidi nego obični smrtnici koji su poginuli u besposlici koja po šerijatu nije dopuštena. On je izjavio da je nogomet haram i da je u islamske zemlje došao sa Zapada, kolijevke nemorala. On je izjavio da su samo tri sportske discipline po islamu dopuštene, a to su bacanje koplja, plivanje i konjaništvo. On je dodao: *Oni koji su otišli na nogometnu utakmicu i poginuli u sukobu sa suparničkom stranom nisu išli na Božjem putu nego na putu dangube i stranputice i za vrijeme utakmice sigurno nisu klanjali niti su imali abdest, niti su imali Svevišnjega na umu.* On je zatražio da novac koji se troši na nogomet usmjeri na učenje Kur'ana napamet. On se žestoko okomio na mlade demonstrante koji na protestima traže odlazak vojne vlasti, da zapravo traže pad države i njenog temeljnog ustrojstva.

Na izjavu glasnogovornika pokreta Selefija reagirao je Mahmud Kettami koordinator El-Ezherske uleme u Aleksandriji osudivši izjavu Šehhata rekavši: *da onaj koji je poginuo nevin i nepravično i iznenadno, šehid je po islamskim propisima, pa su po njemu poginuli u Port Saidu šehidi.* Zanimljivo je da šejh Kettami smatra da oni koji odlaze na nogometne utakmice i druge sportske priredbe, a ne u kafiće, barove i na druga nemoralna mjesta i ne skitaju, ne čine grijeh nego samo upražnjavaju svoje slobodno vrijeme.

Odmah nakon nesreće na stadionu u Port Saidu egipatski mediji su javili da je poznata vjerska islamska policija u Saudi Arabiji *El Emru bil-ma'rufi ven-Nehju anil munkeri* saopćila da je poginule snašla Božja kazna jer su igrači oba tima igrali u nepristojnoj odjeći. Duhovi su se toliko uzбудili da je morao intervenirati i Veleposlanik Saudijske Arabije u Kairu koji je demantirao bilo kakvo priopćenje tim povodom iz Saudijske Arabije. On je sa žaljenjem izjavio da se u Egiptu i arapskom svijetu svašta podmeće kraljevini Saudijske Arabije, pa i ovo oko žalosnih događaja u Egiptu.